

Ո Ր Ո Շ ՈՒ Մ N 126/6
/վարչական տույժ նշանակելու մասին/

«24» փետրվարի 2022թ.

ք. Վանաձոր

Հայաստանի Հանրապետության պետական եկամուտների կոմիտեի Արևելյան մաքսատուն-վարչության պետի տեղակալ, պետի ժ/պ Ղազար Ղազարյանս, ուսումնասիրելով Գևորգ Պողոսյանի /անձն. AS0519753, քաղաքացիություն՝ Հայաստանի Հանրապետություն/ կողմից մաքսային կանոնների խախտում կատարելու վերաբերյալ նյութերը

Պ Ա Ր Զ Ե Ց Ի

Հայաստանի Հանրապետության քաղաքացի Գևորգ Պողոսյանի անվամբ 17.06.2019 թվականին թիվ 05100033/170619/0000419385 մաքսային մուտքի օրդերով «Ժամանակավոր ներմուծում» մաքսային ընթացակարգով՝ մինչ 16.06.2020թ. վերջնաժամկետով, ՀՀ տարածք է ներմուծվել TOYOTA MARK X մակնիշի, VF229FV հաշվառման համարանիշի, 2005 թվականի արտադրության տրանսպորտային միջոցը:

ԵՏՀ խորհրդի 29.04.2020թ. № 47 և նույն որոշման երկու փոփոխությունների՝ 11.09.2020թ. № 79 և 05.04.2021թ. № 25 որոշումների համաձայն՝ երրորդ երկրներից ԵՏՀ տարածք ժամանակավորապես ներմուծված անձնական օգտագործման տրանսպորտային միջոցների ժամանակավոր ներմուծման ժամկետը երկարաձգվել է մինչև 2021 թվականի սեպտեմբերի 30-ը:

Մաքսային մարմինն արձանագրում է, որ նշված ժամկետի ավարտից հետո Ծրագրում նշված ՄՄՕ-ն երևացել է որպես ժամկետանց պարտավորություն, ինչի կապակցությամբ լիազոր մարմինը ձեռնամուխ է եղել ՀՀ մաքսային օրենսգրքի 199-րդ հոդվածի ուժով հետագա արտահանման պարտավորության խախտման հանգամանքը բացահայտելու և համապատասխան վարչական վարույթ հարուցելու լիազորությունների իրականացմանը:

21.12.2021 թվականին հարցում է կատարվել ՀՀ ՊԵԿ Ներքին անվտանգության վարչություն՝ վերը նշված տրանսպորտային միջոցի սահմանահատումների վերաբերյալ տեղեկատվություն ստանալու և կողմին հայտնաբերման նպատակով, որին ի պատասխան ստացվել են համապատասխան սահմանահատումների պատմությունը և սահմանահատման տվյալները:

24.12.2021թ-ին Գևորգ Պողոսյանի նկատմամբ կազմվել է մաքսային կանոնների խախտման վերաբերյալ արձանագրություն՝ ՀՀ մաքսային օրենսգրքի 199-րդ հոդվածով նախատեսված մաքսային կանոնների խախտման հատկանիշներով:

Վարչական մարմինն արձանագրում է, որ վարչական վարույթի շրջանակներում հարցումներ են կատարվել նաև ՀՀ ՊԵԿ աշխատակազմի մաքսատուն-վարչություններ՝ նշված ավտոտրանսպորտային միջոցի ձևակերպված լինելու, ինչպես նաև ՀՀ ոստիկանության «Ճանապարհային ոստիկանություն» ծառայություն՝ նշված տրանսպորտային միջոցի նկատմամբ հնարավոր կատարված գործարքների վերաբերյալ տեղեկատվություն ստանալու նպատակով, որոնց ի պատասխան ստացվել են համապատասխան հարցման պատասխանները:

Ներկայացված նյութերի ուսումնասիրության արդյունքում պարզվել է, որ ՀՀ տարածք ներմուծված TOYOTA MARK X մակնիշի, VF229FV հաշվառման համարանիշի տրանսպորտային միջոցը Բագրատաշենի մաքսային կետ-բաժնով ՀՀ է ներմուծվել 17.06.2019 թվականին և հետագա արտահանման պարտավորությունը չի կատարվել, մաքսատուն-վարչություններում որևէ մաքսային ընթացակարգով ձևակերպում չի ստացել, նշված ավտոմոբիլի գրանցման, հաշվառման գործարքների վերաբերյալ տվյալներ չկան:

ՀՀ մաքսային օրենսգրքի 189-րդ հոդվածի 1-ին մասի համաձայն՝

մաքսային կանոնների խախտում է համարվում անձի կողմից կատարված անօրինական գործողությունը կամ անգործությունն, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող ՀՀ միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն:

ՀՀ մաքսային օրենսգրքի 199-րդ հոդվածի 1-ին մասի համաձայն՝

հետագա արտահանման պարտավորությամբ Հայաստանի Հանրապետություն ներմուծված ապրանքները և տրանսպորտային միջոցները սահմանված ժամկետում չարտահանելը կամ հետագա ներմուծման պարտավորությամբ արտահանված ապրանքները և տրանսպորտային միջոցները սահմանված ժամկետում Հայաստանի Հանրապետություն չներմուծելը՝

առաջացնում է տուգանքի նշանակում՝ խախտման օրվա դրությամբ այդ ապրանքների և տրանսպորտային միջոցների համար «ներմուծում՝ ազատ շրջանառության համար» մաքսային ռեժիմով նախատեսված մաքսային վճարների մեծության 50 տոկոսի չափով, բայց ոչ պակաս, քան 50 հազար դրամ:

«Եվրասիական Տնտեսական Միության մաքսային օրենսգրքի 264-րդ հոդվածի 1-ին և 5-րդ մասերի համաձայն՝

օտարերկրյա ֆիզիկական անձանց կողմից՝ Միության անդամ չհանդիսացող պետությունում գրանցված անձնական օգտագործման տրանսպորտային միջոցների

Ժամանակավոր ներմուծումը Միության մաքսային տարածք թույլատրվում է ոչ ավելի, քան 1 տարի ժամկետով:

Ժամանակավոր ներմուծված անձնական օգտագործման տրանսպորտային միջոցները, մինչև այն ժամկետի լրանալը, որի ընթացքում այդ տրանսպորտային միջոցները կարող են ժամանակավոր գտնվել Միության մաքսային տարածքում, Միության մաքսային տարածքից արտահանման, ազատ շրջանառության համար բացթողման կամ սույն հոդվածին համապատասխան այլ նպատակներով ենթակա են մաքսային հայտարարագրման:

Վարչական վարույթի շրջանակներում Գ. Պողոսյանը պատշաճ ծանուցվել է գործի տեղի և ժամանակի մասին, վարչական մարմինն ապահովվել է վերջինիս՝ քննարկվող փաստական հանգամանքների վերաբերյալ արտահայտվելու հնարավորությունը: Կողմը ներկայանալով նշանակված թվով երեք վարչական լուսններին և գործի քննությանը վարույթն իրականացնող մարմնին տվել է բանավոր պարզաբանումներ գործի հանգամանքների մասին՝ հայտնելով, որ 2019 թվականին սեպտեմբեր ամսին ավտովթարի հետևանքով ՀՀ ժամանակավոր ներմուծված նշված մեքենան անհնարին է դարձել շահագործելը, այն ՀՀ-ից արտահանելը, ինչի հետ կապված դիմել է ՊԵԿ կենտրոնական մարմնին, այնուհետև Նորագավիթի ավտոմաքսատուն: Տեղեկանալով, որ անհրաժեշտ է հանձնել մեքենայի համարանիշները, իսկ մեքենան մաքսազերծել ՀՀ տարածքում, հաշվառման համարանիշները հանձնել է Վրաստանի Հանրապետություն, իսկ մեքենան ավտոքարշակի միջոցով հասցրել է Հյուսիսային մաքսատուն-վարչություն՝ խնդրին լուծում տալու համար, սակայն առաջ եկած խոչընդոտների պատճառով մեքենան չի մաքսազերծվել:

Գ. Պողոսյանը ի հիմնավորումն իր փաստարկների վարույթն իրականացնող մարմնին է ներկայացրել նաև «Դիմում» վերտառությամբ գրավոր փաստաթուղթ՝ թվագրված 18.11.2019թ., կից՝ ՊԵԿ նախագահի տեղակալ Շ. Ներսիսյանի 21.11.2019թ. թիվ 18-4173432-2019 գրությունն ուղղված ՊԵԿ Արարատյան վարչության պետին:

Վարչական վարույթի շրջանակներում հարցում է կատարվել ՊԵԿ Արարատյան վարչության պետին, ինչպես նաև ՊԵԿ քարտուղարության պետին՝ խնդրելով տրամադրել քաղաքացի Գևորգ Հովհաննեսի Պողոսյանի անվամբ գրավոր դիմում, գրություն, բողոք, պատասխան մուտք եղած, կամ ելքագրված՝ առաքված փաստաթղթերի վերաբերյալ ՊԵԿ քարտուղարությունում առկա տեղեկությունները, ինչպես նաև տեղեկությունն այն մասին, թե դիմումին ինչ պատասխան է տրվել, հետագա ինչ ընթացք է ստացել դիմումով խնդրարկված հարցը, որոնց ի պատասխան ստացվել են համապատասխան հարցման պատասխանները:

Ներկայացված պատասխան գրությունների մեջ բովանդակվող տեղեկությունների ուսումնասիրությամբ պարզվել է, որ ՀՀ քաղաքացի Գ. Պողոսյանի կողմից ներկայացված դիմումի ընթացքի վերաբերյալ տեղեկատվություն առկա չէ, քանի որ դիմումը հասցեագրված է եղել Արարատյան մաքսատուն-վարչության բացթողնման թիվ 2 բաժնին, որը լուծարված է, իսկ ՊԵԿ «Mulberry» էլեկտրոնային փաստաթղթաշրջանառության համակարգում ՀՀ քաղաքացի Գևորգ Պողոսյանի անվամբ այլ գրություններ առկա չեն:

Վերոգրյալի համատեքստում անդրադառնալով Վարչական իրավախախտումների վերաբերյալ ՀՀ օրենսգրքի 32-րդ, 245-րդ, 279-րդ հոդվածների կարգավորումներին՝ վարչական մարմինը գտնում է, որ սույն գործով ՀՀ ՄՕ 199-րդ հոդվածով նախատեսված իրավախախտումը բացառող հանգամանք կարող էր համարվել այն դեպքը, եթե Գ. Պողոսյանը հետամուտ լիներ իր ավտոմեքենան «ոչնչացում» մաքսային ընթացակարգով ձևակերպելուն, որպիսի մաքսային ընթացակարգ է հայցել ՊԵԿ պաշտոնատար անձից, մինչդեռ, դրսևորելով անգործություն չի զբաղվել նշված հարցով, և ըստ էության, նպաստել է պարտավորությունը չկատարելուն:

Ասվածի մասին է վկայում այն, որ ապացույցներին և ապացուցման գործընթացին ներկայացվող պահանջները հետևյալն են. ապացույցները պետք է պարունակեն կոնկրետ փաստական տվյալներ որոշակի գործողությունների, իրադարձությունների վերաբերյալ: Մինչդեռ, ի հավաստումն դիմումով ներկայացված փաստարկների Գ. Պողոսյանը պարտավոր էր ապացուցել, մինչ վիճելի իրավահարաբերությունը գործող ՀՀ կառավարության 31.12.2000 թվականի N 901 որոշմամբ սահմանված «Ոչնչացում» մաքսային ընթացակարգով ձևակերպվող ապրանքների ոչնչացման Կարգով, մասնավորապես նույն Կարգի 3. և 5. կետերով սահմանված պահանջները պահպանելու փաստը: Այլ խոսքով՝ վարչական մարմինն ցույց տալ առաջ եկած օբյեկտիվ խոչընդոտները, ինչը չհիմնավորվեց գործի քննությամբ:

Այսինքն՝ սույն գործի քննության և լուծման համար էական նշանակություն ունեցող հարցը Գ. Պողոսյանի կողմից Կարգով սահմանված պահանջները պահպանելուն վերաբերող փաստարկները և ի հիմնավորումն դրանց ներկայացված գրավոր ապացույցներն էին, ինչը սույն գործով բացակայում է:

Վերը նշված դիրքորոշումների համատեքստում վարչական մարմինը գալիս է այն եզրահանգման, որ Վարչական իրավախախտումների վերաբերյալ ՀՀ օրենսգրքի 247-րդ հոդվածի ուժով Գ. Պողոսյանի կողմից ներկայացված դիմումներով վկայակոչված փաստարկները չեն կարող դիտարկվել որպես պատասխանատվությունը բացառող հանգամանք և չեն կարող հիմք հանդիսանալ կողմին վարչական պատասխանատվությունից ազատելու համար:

Ըստ ՀՀ ՊԵԿ Արևելյան մաքսատուն-վարչության ՄԳ բաժնի մաքսային տեսուչի պատասխան-գրության՝ Գևորգ Պողոսյանի անվամբ ՀՀ ներմուծված տրանսպորտային միջոցի համար «ներքին սպառման համար բացթողում» մաքսային ընթացակարգով ձևակերպվելու դեպքում կառաջանային հետևյալ մաքսային վճարները. միասնական մաքսատուրք՝ 6,741,177 դրամ և բնապահպանական վճար՝ 281,534 դրամ:

Այսպիսով, վարույթի նյութերով հիմնավորվում է, որ քաղաքացի Գևորգ Պողոսյանը սահմանված ժամկետում չի վերաարտահանել ժամանակավոր ՀՀ ներմուծված TOYOTA MARK X մակնիշի, VF229FV հաշվառման համարանիշի ավտոմեքենան՝ թույլ տալով ՀՀ մաքսային օրենսգրքի 199-րդ հոդվածով նախատեսված մաքսային կանոնների խախտում:

Վերոնշյալի հաշվառմամբ, գործով ձեռքբերված ապացույցների համակցությամբ վարչական մարմինը գալիս է այն եզրահանգման, որ սույն դեպքում առկա է մաքսային կանոնների խախտման հանգամանքը, ուստի, հիմք ընդունելով վերոգրյալը և ղեկավարվելով Վարչարարության հիմունքների և վարչական վարույթի մասին ՀՀ օրենքի 3-րդ և ՀՀ մաքսային օրենսգրքի 221-րդ հոդվածներով

Ո Ր Ո Շ Ե Ց Ի

1. Քաղաքացի Գևորգ Պողոսյանի ՀՀ մաքսային օրենսգրքի 199-րդ հոդվածի 1-ին մասով սահմանված կարգով տուգանել իրավախախտման անմիջական օբյեկտ հանդիսացող ավտոմեքենայի նկատմամբ «բացթողնում ներքին սպառման համար» մաքսային ընթացակարգով, մաքսային վճարների մեծության 50%-ի չափով, այսինքն՝ 3,511,355 /երեք միլիոն հինգ հարյուր տասնմեկ հազար երեք հարյուր հիսունհինգ/ ՀՀ դրամ վարչական տուգանք (վճարման ենթակա գումար):

2. Որոշումն ուժի մեջ է մտնում կայացման պահից, այն օրենքով սահմանված ժամկետներում կարող է բողոքարկվել վերադաս մաքսային մարմին / ք. Երևան, Մ. Խորենացի 3/7/ կամ ՀՀ վարչական դատարան:

Սույն որոշմամբ նշանակված տուգանքի վճարման հաշվեհամարն է՝ 900005024055 /ՀՀ պետական բյուջե, կենտրոնական գանձապետարան, Արևելյան մաքսատուն-վարչություն, ԿՈՂ 29/:

ԱՐԵՎԵԼՅԱՆ ՄԱՔՍԱՏՈՒՆ-
ՎԱՐՉՈՒԹՅԱՆ ՊԵՏԻ Ժ/Պ



ՂԱԶԱՐ ՂԱԶԱՐՅԱՆ